

խնդրելու համար, և նշանով սաստեցի նորան որ կանգնի. յետոյ դառնալով դէպի պահապանը հարցրի:

«Այս կողմերը չ'կան անդեօք չին շինուածքներ, խաչարձաններ, գրքեր»:

— «Շատ կան», պատասխանեց ծերուկը, ձեռքը դէպի աջ ու ձախ շրջելով:

«Յի՛է մենք վերադառնանք», կրկնեցի ես, «քարայրում մեզ գիշերելու տեղ և հաց կըտան»:

— «Սէր սարան սարան ճաւան», իմ գլխիս ու աչքիս վերայ, կեղծաւորութեամբ գլուխը խոնարհեցնելով և աջ ձեռքը սրտին դնելով պատասխանեց պահապանը: Բրօն, որ իմ միտքս հասկացել էր, սկսեց գովաբանել նոցա հիւրասիրութիւնը:

Խօսք տալով, որ երեկոյին կ'վերադառնանք, մենք սկսեցինք ծանր ծանր հեռանալ. մի քանի քայլերից զկնի արդէն ժայռերը ծածկել էին մեզ չար ու բարի աչքերից: Մի ժայռի պատառուածքի արանքից Բրօն ինձ ցոյց տուեց այրի մուտքը, ուր կանգնած էին մօտ երեսուն հոգի զինեալ քրդեր, և նոքա նայում էին մեր բռնած ուղղութեան վերայ, ինչպէս արծիւը նայում է իւր որսի վերայ: «Շատ ոչ, մումաց Բրօն»:

— «Իրանք ինչ են ուզում», հարցրի ես:

«Իրանք կամ մեր ճանապարհը կ'կտրեն, կամ մեր ետևից կ'ընկնեն. մեզ մնում է միայն շտապել և մեր բռնած ուղղութիւնը փոխել»: